

President mr. Maurits de Kort

Corte ta boga pa amplia educacion moral y etica den enseñansa di e islanan

• Su deseo pa sigui duna formamento na docentenan



ORANJESTAD (AAN):

Siman pasa a tuma lugar na Palacio di Husticia na Playa, un sesion di instalacion di Corte Comun di Husticia, di dos Hues cu ta mr. Petrus Pijnenburg y mr. Jojanneke Brandt. Tambe a duna presentacion di e Procurador General di Aruba, esta mr. Amalin Flanegin. Tambe a hiba palabra, decano di Abogadonan na Aruba, esta mr. Grasita Griffith.

E persona cu a hiba palabra principal tabata mr. Maurits de Kort, kende ta presidente di Corte Comun di Husticia. Durante su discurso, el a bay un rato den direccion di enseñansa na e islanan di Caribe, y tambe e discusion riba e atencion pa idioma na scolnan, y ta kere cu tanto den enseñansa primario y avansa, enseñansa profesional, y den e educacion permanente, ta un yudansa grandi pa trata idioma den Reino na forma igual.

Educacion di tur hende:

Un aspecto di enseñansa cu mr. de Kort a desea di menciona ta, cu educacion ta mucho mas cu idioma y rekenen. Un docente tambe ta un ehemplo moral pa alumno- y studiantenan. Esaki ta specialmente berdad den un sociedad den cual algun mayor tin di labora 2 of 3 trabao pa por sobrevivi fin di luna. Unda hopi mayor riba nan so tin di cria nan yiunan, cu ta inclui garantisana pa cuminda y bebida di tur dia y un dak riba nan cabes.

Den e situacion ey, ta imposible pa laga e formamento moral di muchanan cay solamente riba schouder di e mayornan. Al fin al cabo, "it takes a village to raise a child", pues incluyendo docentenan. Laga nos pues bay involvi docentenan tambe y capacita nan pa nan asumi un parti di e formamento moral y etica di nos yiunan.

Esaki tambe ta rekeri algo di formamento continuo pa docentenan. Moderniza e condicionnan di enseñansa ta implica mucho mas cu djis instala airco den klasnan. Ta crucial pa nos permiti nos docentenan pa mantene nan habilidadnan y conocimiento na tur momento, pero tambe sigui formando nan y comprometiendo nan mas ampliamente. Kende ta corda e docente ey, cu ta keda pa resto di bo bida ta dunando sosten? Via e imagen cu bo ta haya di dje, of di e atencion personal y e oreo cu semper ta cla pa scucha bo?

Envolvimento di docentenan: Segun mr. de Kort, di e forma aki, e docentenan lo por muestra tur dia loke moral y etica ta nifica den bida real. Y esey ta crucial pa e educacion di nos yiunan. Pa loke e nifica biba den un sistema democratico, den un estado di derecho. Y di loke ta pidi di bo, pa asina yuda construi un sociedad habitabel.

E educacion etico ey den realidad ta un tarea di nos tur, sin importa unda cu bo ta. Y como Corte di Husticia, nan tambe ta sinti e responsabilidad ey. Como cuidador di ley, y como faro di husticia, Corte kier haci nan parti den esaki cu tur nan amor. Djis pa e motibo aki, nan ta apoya educacion permanente, di e forma cu nan por.

Como Corte, nan tin nan mesun Hof Academy,

unda nan coleganan por sigui ricibi les continuo. Gobierno di Aruba tin su mesun Land Aruba Academy. Y den e cadena di husticia, lo ta bon pa e lesnan aki bira obligatorio den e Landsverordening pa Abogadonan, y tambe e Landsverordening di Deurwaarder. Como Corte, nan a yega di duna e consejo aki caba anteriormente na Ministro di Husticia di Aruba, y na otro paisnan.

Vision amplio di educacion: Segun mr. de Kort, educacion ta un tema importante den ley y derecho. Den derecho civil, un barera di idioma por tin influencia riba un caso. Den derecho di famia, e escogencia di scol di muchanan (door di mayornan) por ta un issue. Den derechopenal, tin biaha ta necesario pa tene cuenta cu e nivel educativo desaroyo di un acusado.

Y pesey e President di

Corte Comun di Husticia ta boga pa un vision amplio di educacion moral y etica den enseñansa na e islanan Hulandes den Caribe: Cu areglo na ki norma nos ta biba den nos sociedad? Kico esaki nifica pa respeta bida di otro, di e integridad di curpa di otro, y di propiedad di hende?

El a splica cu como Corte, nan ta apoya e formamento y enseñansa semper cu nan por. Nan por yuda difundi e conocimiento di ley, na esun cu ta compronde e proceso hudicial, y asina educa tur habitante riba e formaconfuncionamento di ley ta.

Nan ta haci esaki den nan 'Open Dag', den summer courses y ora di core stage. Hueznan di islanan Caribe Hulandes ta dispuesto pa duna conferencia na Universidadnan y lo contribui cu placer cu cursonan di formamento profesional.

Mas Gasoline Station ta bende coriente prepaid

ORANJESTAD (AAN): Den edicion di DIARIO di Diasabra, a sali publica cu NV Elmar y e Asociacion di Dealernan di Gasolin a logra un acuerdo, y a cuminsa bende coriente prepago bek, inicialmente na 3 stacion so, esta esun di Paradera, Palm Beach, y Cura Cabay.

Den fin di siman, DIARIO a tuma nota cu mas Gasoline Station a cuminsa ofrece e servicio di SmartUp Prepaid aki.

Te cu Diadomingo merdia, DIARIO a compronde cu e Gasoline Stations cu ta yuda cu SmartUp Prepaid ta: Santa Cruz, Paradera, Sero Blanco, Tanki Leendert, Ponton, Boulevard, Sasaki, Palm Beach, Cura Cabay, y Essoville.

Tambe bo por sigui cumpra coriente via Pay.aw unda cu bo ta riba e isla.